

# এসএসসি পরীক্ষার ফল : বাস্তবতা মেনে, ভবিষ্যতের পথে এগিয়ে চলতে হবে

: শনিবার, ১২ জুলাই ২০২৫

এবার এসএসসি ও সমমানের পরীক্ষার ফল নিয়ে জনমনে নানা প্রশ্ন এবং প্রতিক্রিয়া দেখা দিয়েছে। চলতি বছরের ফলাফলে পাসের হার ৬৮ দশমিক ৪৫ শতাংশ, যা গত ১৫ বছরে সর্বনিম্ন। জিপিএ-৫ প্রাপ্তির সংখ্যাও গত বছরের তুলনায় প্রায় ৪৪ হাজার কমে এসেছে। দেশের ১৩৪টি শিক্ষাপ্রতিষ্ঠানে কেউই পাস করতে পারেনি। আবার শতভাগ পাস করা প্রতিষ্ঠানের সংখ্যাও আগের তুলনায় কমেছে।

এসব পরিসংখ্যান উদ্বেগজনক হলেও এর পেছনের বাস্তব কারণগুলো স্পষ্টভাবে চিহ্নিত করা জরুরি। কোনো কোনো বিশেষজ্ঞ একে ফল ‘বিপর্যয়’ হিসেবে দেখতে নারাজ। তারা দেশের শিক্ষাক্ষেত্রের বাস্তবতা মেনে আগামীর পথ খুঁজে নেয়াকেই যুক্তিযুক্ত মনে করছেন।

বলা হচ্ছে, এবারের ব্যাচের শিক্ষার্থীরা ষষ্ঠ শ্রেণী থেকে দশম শ্রেণী পর্যন্ত সময়ের উল্লেখযোগ্য একটি অংশ শ্রেণীকক্ষে উপস্থিত থাকতে পারেনি। করোনাভাইরাসের দীর্ঘমেয়াদি প্রভাব, রাজনৈতিক অস্থিরতা, বারবার শিক্ষাপ্রতিষ্ঠান বন্ধ থাকার এসব কারণে শিক্ষাদানের ধারাবাহিকতা ব্যহত হয়েছে।

এবার গণিতের মতো বাধ্যতামূলক বিষয়ে প্রশ্নপত্র অপেক্ষাকৃত কঠিন হওয়ায় পাসের হার কমেছে। উত্তরপত্র মূল্যায়নে এবার ‘উদার নীতি’ ছিল না। সংশ্লিষ্টরা দাবি করছেন, আগে যেমন নমনীয়তা দেখা যেত, এবার সেটা হয়নি। পরীক্ষার্থীদের তাদের প্রকৃত যোগ্যতার নিরিখে মূল্যায়ন করা হয়েছে।

নানা প্রতিকূলতা ডিঙিয়ে যারা ভালো ফল করেছে তাদের অভিনন্দন জানাই। প্রতিকূল পরিস্থিতিতে নিজেদের মনোযোগ ধরে রেখে সাফল্য অর্জন নিঃসন্দেহে প্রশংসনীয়। বিশেষ করে মেয়ে শিক্ষার্থীদের অব্যাহত অগ্রগতি লক্ষণীয়। পাসের হার ও জিপিএ-৫ দুদিকেই মেয়েরা ছেলের ছাড়িয়ে গেছে।

যারা কাক্সিক্ষিত ফলাফল অর্জন করতে পারেনি, তাদের হতাশ হওয়ার কিছু নেই। পরীক্ষায় পাস না করাকে জীবনের ব্যর্থতা মনে করার কোনো যৌক্তিকতা নেই। বরং এটি হোক আত্মসমালোচনার সুযোগ এবং পরবর্তী প্রস্তুতির প্রেরণা। প্রকৃত শিক্ষা মানে শুধু নম্বর অর্জন নয়, জ্ঞান অর্জনের প্রক্রিয়াই সবচেয়ে গুরুত্বপূর্ণ।

এই ফলাফল আমাদের শিক্ষাব্যবস্থার কাঠামোগত দুর্বলতা ও সংকটগুলো আবারও সামনে এনেছে। একটি জাতির অগ্রগতির জন্য শক্তিশালী শিক্ষাব্যবস্থা অপরিহার্য। সেক্ষেত্রে দীর্ঘমেয়াদি পরিকল্পনা, শিক্ষকদের উন্নত প্রশিক্ষণ, সমন্বিত পাঠ্যক্রম এবং প্রতিটি শ্রেণীর জন্য উপযুক্ত মূল্যায়ন পদ্ধতি নিশ্চিত করা জরুরি। একইসঙ্গে শিক্ষার্থীদের মানসিক স্বাস্থ্য, ট্রমা মোকাবিলা এবং সহায়ক পরিবেশ গড়ে তোলার বিষয়েও গুরুত্ব দিতে হবে।